

憨山老人夢遊集

憨山老人夢遊集卷三十五

侍者福善錄

門人通炯編輯

嶺南弟子劉起相重較

夢遊詩集自序

集稱夢遊何取哉曰三界夢宅浮生如夢逆順苦樂榮枯得失乃夢中事時其言也乃紀夢中遊歷之境而詩又境之親切者總之皆夢語也或曰佛戒綺語若文言已甚況詩又綺語之尤者且詩本乎情禪乃出情之法也若然者豈不墮於情想耶予曰不然佛說生死涅槃猶如昨夢故佛祖亦夢中人一大藏經千七百則無非寢語何獨於是僧之爲詩者始於晉

之支遠至唐則有釋子三十餘人我明國初有楚石見心季潭一初諸大老後則無聞焉嘉隆之際子爲童子時知有錢塘玉芝一人而詩無傳江南則子與雪浪創起雪浪刻意酷嗜遍歷三吳諸名家切磋討論無停晷故聲動一時予以耽枯禪蚤謝筆硯一鉢雲遊及守寂空山盡唾舊習胸中不留一字自五臺之東海二十年中時或習氣猛發而稿亦隨棄年五十矣偶因弘法罹難一詔下獄濱九死旣而蒙恩放嶺海予以是爲夢墮險道也故其說始存因見古詩之佳者多出於征戍羈旅以其情真而境實也

且僧之從戍者古今不多見在唐末則谷泉而宋則  
大慧覺範三人在明則唯予一人而已谷泉卒於軍  
中所傳者唯臨終一偈曰今朝六月六谷泉受罪足  
不是上天堂便是入地獄言訖而化大慧徙梅陽則  
發於禪語有宗門武庫覺範貶珠厓則有楞嚴頂論  
其詩集載亦不多顧予道愧先德所遭過之而時且  
父所遇亦非昔比也丙申春二月初至戍所蘄飢三  
年白骨蔽野予卽如坐屍陀林中懼其死而無聞也  
遂成楞伽筆記執戟大將軍轅門居壘壁間思效大  
慧冠巾說法構丈室於窮廬時與諸來弟子作夢幻

佛事乃以金鼓爲鐘磬以旗幟爲幡幢以刁斗爲鉢  
盂以長戈爲錫杖以三軍爲法侶以行伍爲清規以  
納喊爲潮音以叅謁爲禮誦以諸魔爲眷屬居然一  
天道場也故其所說若法語偈讚多出世法而詩則  
專爲隨俗說也雖未陞法堂踞華座拈槌豎拂而處  
塵勞混俗諦頓入不二法門固不減毗耶特少一散  
花天耳其說不純以對機不一乃應病之藥固無當  
於佛祖向上關其實爲上下千載法門一段奇特夢  
幻因緣及蒙賜還初服之南嶽匡廬又若夢遊天姥  
也二十餘年侍者福善日積月累門人通烟從居五

乳編次成帙向有求者未敢拈出恐點清淨界中新  
安仰山門人海印請先以詩次第梓之予知醒眼觀  
之如寒空鳥跡秋水魚蹤若以文字語言求之則賢  
目空華終不免爲夢中說夢也天啟元年歲在辛酉  
春王正月上元日匡山逸叟憨山老人釋德清書於  
枯木菴中

征途述懷十章章四句

矯矯冥鴻載飛且鳴哀哀求侶悲此遠征一火雲若  
流白日如矢遐征不歸誰其念只二濯泉洗耳采薇  
充飢我豈無心彼何人斯三紫芝英英白石燦燦邈

矣懷人夜以達旦四誰云滴水可以穿石孰云忘憂  
我心如織五日亦可冷風亦可繫憂從中來不知所  
自六亭亭長松猿鶴依只悠悠白雲我心逝矣七載  
飢載渴易食易飲嗟彼醉夫難以獨醒八有酒有旨  
寔爲友朋惟玄惟漠尊疊久空九嗟彼行人往來相  
顧扣其所以莫知其故十

感時詩十五章章四句

有序

頃聞四方連年水旱加以蝗災民生惶惶朝不待  
夕有司請告 皇慈愍之內外公府齊發金穀出  
賑百僚仰德各捐俸一年以助昔所未有感之以

詩

上天好生胡爲其愆斯民迷安曷爲不然一滔滔洪水禹則治之淫雨橫流孰能禦之二甘露瀼瀼時雨如漿片雲不興我民惶惶三雨澤愆期民之瘁矣矧此旱魃爲祟甚矣四蝗飛蔽天胡爲而然啜膏食脂使民瞋瞋五民之所親食逾父母易子而食斯言良苦六維皇之天斯民是愛斯民之命皇天是賴七皇仁浩浩施金與穀誰能嚶水使天雨粟八以敬其天雨暘時若以哀其民所施逾博九報功之資上天所司匪曰同胞孰能畀之十邈矣上古嘉禾自生哀哉



求運播植不登十蠢蠢之生予寔同之皇皇上天予  
共戴之二十安得地肥不勞民力安在軒皇任其食息  
計康衢之民無時不有陶唐之化孰云匪久四十時之  
往矣不可輓也民生苦矣不可緩也五十

咏懷

園中作

大塊總微塵滄溟一滴水茫茫宇宙間代謝無停止  
達人縱大觀上下千萬紀歷覽在目前賢愚可屈指  
美惡不足稱是非安可擬仲尼重知命老聃貴忘已  
惟我大雄尊超然出生死世界等浮漚身心類塵滓  
幻化祇如斯榮辱何憂喜顛倒任空華吾視此而已

廬陵淨土菴受王性海諸居士齋因懷汪使君  
廬陵一粒米價重過須彌須彌尚可碎此粒無壞時  
化爲香積飯轉作淨土資拈來信口食一飽忘百飢  
如食金剛屑終竟透出皮此土多蓮華衆妙香芬披  
一人坐一華左右相追隨光明映日月彈指超僧祇  
華中少一人悠悠勞我思

廬陵喜再逢王塘南翁

有引

余二十五歲曾遊青原晤翁時年五十今復晤之  
又過半矣宛然在昔以翁精心白業色若嬰兒感  
故念今喜而賦贈

人生一百歲四分二十五初逢半之半再會十之五  
君已過三分宛然似初覩面如嬰兒色骨似金剛股  
心想入蓮華音聲出天鼓端坐七寶臺經行衆香樹  
不離五蘊身便是清淨土打破頻伽瓶卽見華中主  
與君雖別離恰是相逢處

六詠詩

心

金翅鳥命終骨肉盡消散唯有心不化圓明光燦爛  
龍王取爲珠照破諸黑暗轉輪得如意能救一切難  
如何在人中日用而不見

無常

法性本無常亦不墮諸數譬彼空中雲當體卽常住  
聖凡皆過客去來無二路是生不是生非新亦非故  
智眼明見人此外何所慕

苦

夢入大火聚怕怖多惺惶正當苦惱時滴水便清涼  
水盡火復然念慕何慨慷及至醒眼觀向者誰悲傷  
空

須彌橫太虛大地浮香海六塵蔽性天四大遍法界  
劫火洞然時此箇壞不壞何必待燒盡然後無障碍

無我

一水作衆味酸鹹苦辣具以本淡然故而能成衆事  
若實不隨者安肯隨他去唯有不隨者誰能識此趣  
生死

生死不流轉流轉非生死若實不流轉生死無窮已  
諦觀流轉性流轉當下止不見流轉心是真出生死  
苦熱行

人世苦炎熱余心何清涼直以無可觸故能安如常  
譬如火浣布得之愈增光視彼區區者錯然誰敢當  
月夜過三峽

扁舟載明月隨流競奔頽帆影似轉變月光無去來  
心境本寂滅死生安在哉所寓卽常樂此外俱塵埃

懷淨土詩四首

嗟哉堪忍土多慮而爲人憂來百念結綢繆役其形  
衆苦集微軀臭腐搏青蠅憤憤不自知營營竟朝昏  
明潔日以虧汨沒疲精神安能滌情垢一旦返而真  
長揖大火宅從此謝囂塵逍遙清淨土其樂方無垠  
我聞至西極有國名極樂妙嚴飭官殿寶網珠絲絡  
天人普集會光明相映奪園林敷雜華空中散天樂  
蓮開八德池香浮七寶閣微風吹簷端雲間響金鐸

衆鳥相和鳴法音恣宣說凡情一經耳衆苦當下脫  
極樂本非遙駕言十萬億但能一念淨觸目現前是  
蓮華生欲泥清涼發焰熾瓦礫等瓊瑤寶林出荊刺  
念結阻山河想銷破幽滯險道登坦途情根證初地  
誰知微密中淨穢苦樂具試觀空中華起滅了無際  
苦因增愛生樂從清淨得譬若夢中人貴賤匪外覓  
情想本無端苦樂非預設瞻彼晴空雲倏忽多變滅  
愚者執爲真逐境勞欣感達人貴朗照了罔淨陳習  
一悟永不迷靈淵常湛寂願乘白毫光端居極樂國  
采珠行

灼灼明月珠產向深淵底從空撈捫之魚龍盡驚起  
鮫人相抱泣洒淚忽成雨腥風撲遠岸鯨波奔萬里  
密網垂天雲輕帆展鵬翼一擘川后愁再擊海若徒  
盡剖蚌蛤腹不補蒼赤髓安得如意珠持歸報天子  
神光發中夜龍顏大欣喜七寶隨所求四事盡豐美  
展轉濟孤貧利樂無窮已用賞戰勝功傳爲灌頂社  
罷此批鱗役聊以釋附髀滄海不揚波溝瀆清塵滓  
願祝吾皇壽量同東海水

咏龍

變化無端倪噓吸作雲雨膏澤潤蒼生滂沱霑下土



倏忽遍九垓頃刻被寰宇豈若沙中蟲與物同臭腐

咏虎

長嘯發空山悲風振林木颯颯秋雨寒淒淒夜鬼哭  
腥膻徒自矜皮毛甘可服何如偃鼠安飲河期滿腹

贈曹溪行脚僧

有引

南韶觀察祝公下車之初痛念祖庭荒廢極意整頓且自號爲曹溪行脚僧感而賦贈

曹溪行脚來元自曹溪去久假而不歸忽憶曹溪路  
卽墮宰官身依然無所住任運大化中襌襪安能褻  
猶記別時言菩提本無樹以是不迷人觸目多感悟

隨緣到故鄉萬山滿烟霧未入曹溪門此心已如故  
況見昔時人淒然瀝情素提起屈晦衣宛若初分付  
椎碎墜腰石打開寶藏庫掇出如意珠獨誇長者富  
三車隨所施諸子忽驚怖一喝泣鬼神片言逐狐兔  
魍魎顛潛蹤龍蛇喜交錯經行寂滅場往來憑杖屨  
穿破礪底雲踏乾草頭露瓦礫盡生輝靈源永不涸  
誰知先後身主賓自相顧願執漚和鞭長驅白牛步  
酬董國傅崇相過訪曹溪

君向曹溪來直入曹溪路溪上忽逢君乍見已如故  
一笑心眼開主賓忘禮數促膝坐更深歷歷披情素

高懷皎冰雪，清言振金玉。俯視六合空，長軀千里步。  
歲暮事遠遊，理冥無去住。把手送君行，溪橋獨延佇。  
綠槐社諸子，過訊予時掩關未面而去示之以  
此

炎炎火宅中，一片清涼地。雖從長者施，實係君王  
賜。法侶喜相過，高懷發幽秘。洞見未語心，直達無生  
意。何必問毗耶，此中真不二。

董太史玄宰寫雪山圖贈予之雷陽賦答

五臺三伏天，江南鴈月樹。孤蹤空裏雲，餘生草頭露。  
寒熱本無端，南北任去住。隨地足清涼，此中何所慕。

癸卯初度自五羊之曹溪舟中作

今朝五十八、明日五十九、未來不可思、過去何所有。  
世相空裏花、毀譽鏡中醜、不推羊鹿車、喜隨牛馬走。  
自愧膝穿蘆、却怪肘生柳、髮散少冠束、面厚多塵垢。  
戰退生死軍、打碎無明日、使盡老婆心、笑破虛空口。  
兩岸既不容、中流非所守、來往任風波、去住絕偕耦。  
天際望長安、寒空一回首、回首問時人、誰是儂家友。

遊方廣寺

朝披南嶽雲、暮宿方廣寺、峒崕一徑深、千峰鎖幽秘。  
儼坐青蓮華、頓入清涼地、流泉和松聲、如對談不二。

但絕世間心莫問西來意安能結枝棲以滿居山志  
休息芭蕉身涕唾空華事從此謝塵氛永絕生人累

遊南嶽登祝融峰

我懷南嶽山夢想四十年天際七十峰居常在目前  
自愧無羽翰況爲形纏牽頃踐故人約始得恣遊盤  
攝衣登祝融一望空楚天湘流引足練星斗如腰纏  
去天不盈尺恍惚隨飛仙睥睨萬象小世界如彈丸  
身已入空虛足底浮雲烟若御冷風去從此超塵寰  
回首思古人三生竟何緣曹溪一滴水化爲霖雨露  
焦枯發靈芽法鼓醒瞋顛如何獅子窟今令狐兔潛

梵宇空寥寥、慧燈昏不昧、誰秉照天燭、一破長夜眠、徘徊轉悽惻、飲泣如流泉、安得巨神通、彈指變大千、頓成七寶土、遍地敷金蓮、一覩空中雲、普集諸聖賢、

別南嶽山人鄭慕一

我從曹溪來、擬向山中老、山靈不我欺、滿目雲霞好、歷覽古道場、金沙墮叢篠、籊籊殘煨芋、處幽蹤莫可考、遙想磨磚師、成佛苦不早、獅子窟中王、誰能犯牙爪、法雨久不潤、靈苗竟枯槁、嗟我來何遲、臨風增懊惱、幸遇餐霞人、相期出世表、欲與坐深巖、玄言窮要眇、愛此高尚心、真能謝紛擾、蓮華社未開、又取東歸道、

良以天屬情日久縈懷抱今暫辭雲山此心終未了  
我登江上舟君隱山中豹因思李鄴侯君閒恐不保  
但留窻前雲待我歸來掃

從南嶽東遊江上留別方覺之

與子江上逢擬結山中好相期臥白雲可共終休老  
山靈不我留拽杖辭窈眇子亦倦遊人志在烟霞表  
潛神衆妙門久欲辭紛擾衷情繫所天未卽恣懷抱  
今我駕慈航揚帆涉浩渺與子雖別離因緣猶未了  
假我未窮年重拈一莖草遲爾婚嫁畢歸來時尚早

別衡山解嘲

空林臥不堅復理東歸權縹緲辭雲山繾綣縈懷抱  
衡嶽七十峰久欲恣幽討適來即便去返遺山靈謂  
歸來旣已遲言別亦何早我本山中人丘壑宿已飽  
杖屨烟霞生坐臥麋鹿遶眼耳不容塵心光離昏曉  
四大如空谷六根絕紛擾到處卽深山何必戀枯槁  
試問山中人靜縛何時了打破琉璃瓶始識隨緣好

武昌逢石浪岷嶽二禪人還蜀省親因示

我本行脚僧忽逢行脚客借問行脚事相視無言說  
匡廬一片雲峨眉千尺雪箇是行脚心去來水中月  
因思母子情念念不相隔今歸承歡顏恰似未曾別



奉旨不奉甘問冷不問熱劈破娘生面乃見不生滅  
方是行脚人到家之時節

示聞子與病中

病從有我生我因煩惱集煩惱癡愛滋生死輪不息  
情根如機梭妄想相交織織成幻妄身衆苦皆叢積  
求出苦方便慧劍急揮斥斬斷妄想絲根境當下寂  
一念了無生四大各歸一求我不可得病從何處覓

歸匡山

余少志遠遊三十住山脩二十年忽被業風吹入  
幻海二十餘年而此一念未離寒巖冰雪中也頃

幸晚歸匡山以遂投老蓋年七十二矣嗟嗟浮世  
人生幾何視此餘生如西山落日浮光瞬息乃爲  
詩以紀之

浮世無百年夢遊七十餘幻海渺洪波彼岸無方隅  
一葦隨天風飄飄任所如歷覽周八荒險阻非一途  
神疲力已倦削跡爲遠圖烟霞結夢想巖穴心久辜  
垂老方遂志拂袖歸匡廬一超濁世緣衆念悉已枯  
千峰抱幽壑邈與人世殊七賢列雲中五老頻招呼  
眉目時相對嘯傲多歡娛明月有時來一鏡懸空虛  
清光入蓬華照我顏色舒白髮對青山形影如冰壺

類然踞石牀，日夜雙趺跏趺返觀。未生前本來一物無了知，幻化緣胡爲有生，拘從此脫紛紜，高登常樂都。  
寄錢太史受之

匡廬列雲霄，江湖邈天際。地湧青蓮華，枝葉相鮮麗。睠彼華中人，超然隔塵世。夢想五十年，良緣圖未遂。偶乘空中雲，隨風至吳會。東南美山水，醞藉多佳士。一見素心人，精神恍如醉。未語肝膽傾，清言入微細。相對形骸忘了然，脫拘忌精白出世心。太虛信可誓，苦海方洪波。願言駕津濟，把別向河梁。遂我歸山志，長揖返匡廬。藏蹤杳深邃，五老與七賢。日夜常瞻對。

誅茅臥空山，烟霞爲衣被。視此芭蕉身，一擲如棄涕。  
緬想未歸人，馳情勞夢寐。安得駕長虹，凌風倏然至。  
暫謝塵世緣，入我真三昧。

歸宗登金輪峰禮舍利塔

我登金輪峰，一覽乾坤窄。衆山如蟻奔，彭湖小如楫。  
萬壑吼長風，吹落天邊月。夜靜俯下方，燈火自明滅。  
身一入空虛，諸想頓消歇。遙念救世尊，法身遍一切。  
舍利自西來，至人布三業。峰頭立浮屠，莊嚴以金鐵。  
爰感大丈夫，建刹捨居宅。遂爲光明幢，法緣從此結。  
上下千餘年，清涼解炎熱。嗟彼衆生界，四相轉成劫。

禪宮委荆榛，金碧成瓦礫。叢林遭斧斤，孤松獨挺特。  
根株半剝斷，枝柯將天折。何期至人來，呪願施膏澤。  
以此卜重興，法雷震前哲。皮骨日夜長，密茂返生色。  
果滿金剛心，荒蕪從此闢。法藏自天來，龍光照巖穴。  
梵宇如雲興，四衆增歡悅。始知淨穢土，轉變隨心別。

東林懷古

少就遠遊志，夙慕東林師。青山開白社，高賢畢在斯。  
惜晷刻蓮漏，清修禮六時。淨念絕塵想，極樂爲歸期。  
高風振千載，翹首結遐思。光容如在眼，夢寐相追隨。  
垂老始攀陟，撫景增餘悲。荒林翳頽垣，草莽重紛披。

徘徊三笑處，莓苔露華滋。影堂列羣彥，彷彿見芳規。  
古砌鎖寒烟，白蓮開污池。香谷發清響，地籟天風吹。  
丘陵有遷變，至道無改移。師有未了願，重來亦何遲。  
開林儻如初，高蹤尚可追。山靈久呵護，神運常在茲。  
我已畢命待濁世，從此辭。

感遇詩奉酬南康袁使君

有引

九漈表使君治郡南康匡南湖山盡歸化育不唯  
斯民戴德卽巖穴之士儼若端居白毫相中也棲  
賢古刹久墮荒榛一旦舉而新之又架箭雲橋以  
濟險道此名山不朽勝事法雲開創實感護法精

心承惠寺記一言足垂千載勒石告成俚言致謝  
匡廬高入雲乾坤鍾秀氣千峰列重霄青蓮擁天際  
往多食霞人藏形養幽秘一自遠公來開林結真契  
高賢集如雲清脩期出世山色映湖光入境兩相媚  
憶昔龍象儔法幢列如市瞻彼棲賢老舌根如鼎沸  
拈槌豎拂間直指西來意誰知千載下造化潛更替  
寶塔墮荒榛諸天委荊刺長者一莖草雖拈未見諦  
況復野干鳴難同獅子戲鐘磬寂無聲山空神鬼泣  
天假至人來靈山親授記示現宰官身隨緣作佛事  
法雨潤焦枯甘霖澤羣卉一片金剛心廣布如天地

斯民若嬰兒慈母相盼睇吐哺不啜甘調劑剔所忌  
凡在指顧間鮮不爲生計千里坐春風荒村無犬吠  
頓置含齒氓儼在葛天氏政暇多幽況尋山探靈異  
覩此祇陀林慨發重興志一舉運斤手丹榱若雲翼  
不日梵宮成恍忽如天至神力尚有餘莊嚴若未備  
絕壑架飛梁長虹帶蒼翠玉淵臥虬龍形影如顧視  
五老與七賢鬚眉雲中墜慈航設險道往來無困躋  
緬懷利濟恩豈特居方內每接欬唾餘玉屑灑肝肺  
琬琰勒佳章片石鐘鼎寄功德載名山匡君應列祀  
樵歌接梵音誦祝千萬禩空谷積雲霞盡爲供奉器



感此希世緣，短吟寫胸臆。願言保遐齡，永錫天人類。  
有所思

與君一別數千里，思君不斷如流水。流水東馳去不還，我心如環之無端。舉首望長空，長空杳無涯。揮手邀明月，明月有來時。光影縱相顧，可望不可攀。安得君容如滿月，使我一見開心顏。

觀侯生画山水詩

侯生貧壓夷門客，執轡何人過其宅。獨有丹青思入神，風流足可稱癡絕。一室懸磬冰雪清，烟雲時向毛孔生。空中麋鹿時時走，暗裏山靈夜夜驚。晝長閉戶

門卻掃，染肉不足，烟霞飽含。濡墨汁當醍醐，時人却怪形容好。頻年甲子六六支居間，一半常苦飢，尺布斗粟博美酒。清泉白石令人嗤，有時獨向街頭立，見人未語先羞澁。都言窮骨軟如泥，誰信剛腸勁似鐵。三江五湖波浩蕩，千巖萬壑爭奇狀。閒披絹素淡揮毫，一齊撮在眉尖上。入山尋討楸木株，松下一見歡相呼。喫茶只恨千鍾少，問法從來半字無。老夫肚大舌頭長，吞吐萬里明月光。星辰散落無收拾，君堪與我爲奚囊。留君且向山中臥，白雲片片青天幕。渴飲清流嚼紫芝，海枯石爛從他那。

曇花精舍歌贈祇園逸史杜將軍韜英

我昔遨遊妙嚴國眼見曇花白似雪花下林林大士  
身容儀光照黃金色此花不是等閒開千年一度方  
苞胎至人將現花先發獨爲因緣大事來大事因緣  
非一類千百億身皆度世三乘八部應念周十方法  
界隨心至或現天大將軍身威風八面如天神萬里  
橫行略無敵攬捨盡掃清烟塵變化無端甚希有亦  
以曇花開笑口月下吹笙鳳鳥來馬上揮戈獅子吼  
一開便作人間瑞人與花神兩無二人效祇陀布地  
心花作園林功德事將軍用武不離禪精舍小築祇

園邊對花心入無生國閉戶身居極樂天殺機盡是  
降魔智色香妙露西來意見色聞香法界空當場戰  
入三摩地氤氲造化花中主文彩縱橫邁今古陽春  
號令發雷霆風雲變態驅龍虎園林廣大花無恙精  
舍剛剛方一丈古今天地芥裏空世界山河鏡中像  
曇花入鏡倍精神將軍亦是鏡中人萬里懸空如對  
面眼聽何如耳見真我亦祇園花下史時時灌溉禪  
那水五蘊蔓草久芟除四大幻身沒依止拋向炎荒  
如露布鏤湯爐炭無回互忽見花間舊主人寄聲莫  
忘來時路

木菴歌

淨泰禪人更字木菴南臯居士有贈因戲書之

枯木菴枯木菴象嶺巖前獅子龕拳枝竒曲無可攀  
霜葉雲披何藍氎望之若杌不足取就之枯槁如真  
參雪老堂中如着此文殊前後何三三我已老朽識  
海乾與爾同坐枯木菴

烏夜啼

寒林積雪白日西慈烏啞啞枝上啼鴟梟在巢未敢  
棲飢不得食情慘悽虞人網羅亦何密飢烏之肉不  
足食何事綢繆日夜求返哺不遂情何極母子分飛

兩不全。況復母死歸黃泉。啼聲不絕如杜鵑。令子抱  
恨遺終天。啼鳥啼鳥真可憐。虞人忽死鴟梟殲。明明  
天道何昭然。

遊浮山歌

空中一島攢青霞。宛如香海浮蓮花。巖龕石竇簇花  
蕊。又如帝網珠交加。我來遙登華藏界。一開雙眼無  
遮礙。周圍行樹影重重。分明炳若瓶中芥。橫空殿閣  
雲中影。法身不動青山穩。飛來花氣暗香浮。習習侵  
人重衲冷。拽杖撥開巖中霧。怪石崢嶸若棋布。指點  
還如數列星。一噴青天洒飛唾。石門磴道一線通。側

身半壁足不容猿行鳥度亦不易如何使我筋力窮  
攀蘿直上妙高頂眼底湖光霞布錦足未離地身舍  
空回看一似冰壺影小轉還過會聖巖巖廊石室何  
奇哉遠祖因棋善說法黑白未兆令人猜度溪西上  
蓮華石朵朵金蓮從地出徘徊不見華中人但聽松  
風廣長舌回禮金谷丈六身虛明無地容纖塵劫穴  
洞然此不壞始信蒼巖是本真我欲誅茅依石室餘  
生借此藏蹤跡儻得安眠白日高身心世界都拋擲  
如何捨此從他去一葉浮空都是寄不若快便早歸  
來休教猿鶴常相憶華藏從來是故宅行盡十方出

不得潛身頓入一微塵何人於此知消息

擔板漢歌

有引

徑山法窟自大慧中興臨濟之道相續慧命代不乏人近來禪門寥落絕響久矣頃一時參究之士坐滿山中至有一念瞥地當體現前得大自在者惜乎坐在潔白地上不肯放捨以爲奇特不知返成法礙也教中名爲所知障所以古云直饒做到如寒潭皎月靜夜鐘聲隨叩擊以無虧觸波瀾而不散猶是生死岸頭事所謂荆棘林中下脚易夜明簾外轉身難名抱守竿頭靜沉死水尚不許坐



住況有未到瞥地偶得電光三昧便以爲得弄識  
神影子者乎此叅禪得少爲足古今之通病也恐  
落世諦流布疑誤多人因有請益者乃笑爲擔板  
漢歌以示之歌曰

擔板漢擔板漢如何被他苦相賺只圖肩頭輕不顧  
脚跟絆縱饒擔到未生前早已被他遮一半者片板  
項上枷渾身骨肉都屬他若不快便早拋却百千萬  
劫真冤家行也累坐也累明明障礙何不會只爲當  
初錯認真清門淨戶生妖魅開眼見閉眼見白日太  
虛生閃電乾闥婆城影現空癡兒認作天宮殿要得

輕須放下。臭死蝦蟇爭甚價。烏豆將來換眼睛。魚目  
應須辨真假。有條路最好行。坦坦蕩蕩如天平。但不  
留連傍花柳。管取他年入帝京。捨身命如大地牛馬  
駝驢。不須避果能一擲過。須彌劍樹刀山如兒戲。若  
愛他被他害。累贅多因費管帶。一朝打破琉璃瓶。大  
地山河都粉碎。我勸君不要擔髑髏。有汁當下乾分  
身散影。百千億從今不入死生關。

聞沈朗臞掩關姑蘇城中歌以寄之

火宅炎炎夢未醒。塵中一片清涼境。但見燎空烈焰  
高道人一念如冰井。市聲喧闐奔萬馬。日夜不休何

爲者耳根寂滅心不生看來盡是空中假妻子對面  
如化人返觀亦似鏡中身終朝相見不相識兩眼何  
處容纖塵有時神遊華藏界揮毫一灑胸中塊明善冊青  
水光山色影重重交羅攝入無障礙有時坐入蓮華  
土地平如掌金沙布八德池中菡萏開香風一觸心  
開悟方丈一室無壁落量含法界同寥廓十方海會  
人其中坐叅更不勞行脚匡廬萬丈懸太虛與君恰  
似同室居出不入不來往問君此際心何如

從軍詩

有引

余以弘法罹難蒙 恩遣雷陽丙申春二月入五

羊三月十日抵戍所時值其地饑且癘已三歲矣  
經年不雨道殣相望兵戈滿眼疫氣橫發死傷蔽  
野悲慘之狀甚不可言余經行途中觸目興懷偶  
成五言律詩若干首久耽枯寂不親筆硯其辭鄙  
俚殊不成章而情境逼真諒非綺語聊紀一時之  
事云

楚澤非炎徼行吟愧獨醒  
瘴烟千嶂黑宿草四時青  
颶觸秋濤怒人蘄厲鬼靈  
從來皆浪跡今日更漂萍  
火宅誰堪避清凉自可求  
天低偏近日樹老不知秋  
海月心何寂空雲思欲浮  
却憐無住客今復寄炎洲

舊說雷陽道今過電白西萬山嵐氣合一錫瘴烟迷  
末路隨蓬累殘生信馬蹄那堪深樹裏處處鷓鴣啼  
遠道經行地孤雲獨可憑有家俱是客無累卽爲僧  
毒霧熏心醉炎風透骨蒸翻思舊遊處儼若履層冰  
行脚元吾事擔簦固所能心懸萬里月肩荷一枝藤  
乞食愁蠻語安禪喜俗僧降魔空說劍今日始先登  
出世還行役誰悲道路難長戈聊當錫短髮不勝冠  
沆瀣餘三島炎蒸厲百蠻天南回首處落日是長安  
皇天無不覆豈獨外遐荒曲折吾生短驅馳世路長  
但知心似雪忽覺鬢如霜隨地堪埋骨君恩詎可

忘

昔住清涼界。今登熱惱天。燠寒風氣別。南北地形偏。  
萬里同明月。千山隔暝烟。塞鴻書縱寄。不過鴈峰前。  
髫年從白業。垂老脫緇衣。豈是■君恩薄。多應世道  
違。烟霞行李少。冰雪眼中稀。莫問前途事。家山到處  
歸。

曉起占天候。星河曙色分。潮吞丹鳳日。山吐毒龍雲。  
漂泊還鷗侶。棲遲憶鹿群。誰知逃世客。臨老學從軍。  
此日天涯道。艱虞祇自憐。海風腥釀雨。山氣毒含烟。  
畏路從人後。衝泥向馬前。始知行役苦。多在戍兒邊。

旅宿悲寒食。兵戈老歲年。身經九死後。心是未生前。  
北伐思山甫。南征憶馬淵。梅花何處笛。聽徹不成眠。  
竄逐辭金地。窮荒到海涯。雲容飛赤鳥。星尾曳丹蛇。  
棄杖林成久。揮戈日未斜。天南并塞北。是處有胡笳。  
一鉢從師旅。孤征任轉蓬。形骸乘野馬。心事托冥鴻。  
雲出蒼梧白。霞蒸海日紅。吾生久已棄。不待此時空。  
浮世甘爲客。勞生恨此身。舌存終是苦。道在豈稱貧。  
渴鹿爭趣飲。飢鳥習近人。滄桑雖未變。何地不飛塵。  
一息餘生贅。千山去路長。問途逢牧馬。挾策耦亡羊。  
衷熱三秋日。心寒六月霜。所經如蹈鑊。安敢任踈狂。

幻跡元無住逢山卽當歸因看前路窄轉見此生微  
時抱桑間餓常懷漂母飢所欣無臘月不望寄寒衣  
獨坐

浮世吾身外勞生逆旅中誰能一隻眼豁盡十方空  
碧海飛涼月青林散曉風胡牀箕踞坐瀟洒意無窮  
晚歸營門

混俗希忘象臨戎想牧羝前驅別忍草左袒拘伽黎  
落日江容醉歸雲樹色迷行藏同倦鳥漸漸向人低  
庚子歲卽事四首

豺虎中原遍星軺日夜馳詔無哀痛字人有向隅



悲遠深驪龍窟深批弱木枝乾坤聊俯仰愁絕一雙眉

青海初收捷珠厓始罷征劍門飛赤羽閣道走羗兵  
帝聽懷柔遠王師耻戰爭蠻夷應繫長不見請長纓  
滿目黃塵暗披肩短髮垂江湖歸路杳鷗鷺傍人疑  
康濟思今日安危望此時從來貂珥重寧不愧恩私  
生事人甘拙干戈鼎沸騰金珠欣積累菅草畏追徵  
國是誰堪定天心未可憑南熏何日奏一爲洗炎蒸

過三峽

萬壑奔流下千山紫翠連帆飛三峽雨人入九秋天

客路浮雲外，歸心落日前。吾生猶未已，江漢是餘年。  
宿清溪驛，夢得草蟲鳴斷岸。沙鳥宿寒汀之句。

因續成詩

遡流遵遠渚，旅泊傍孤亭。月隱山容淡，魚潛水氣腥。  
草蟲鳴斷岸，沙鳥宿寒汀。最惜飄零者，浮生夢未醒。

酬朱叔祥惠斑竹禪几

半榻供禪寂，支頤臥白雲。虛心偏愛我，高節獨憐君。  
細拭含湘淚，精裁泣楚文。最宜調病骨，從此絕塵氛。

林叅軍從余入山

戎馬身經老，風烟鬢已班。骨疲仇鐵甲，心冷愛青山。

木札禪離味茶香事儘閒白雲欣共住肯放出松關  
重脩曹溪採木入山

一水縈紆入羣峰夾岸迴人疑秦代住僧似竺乾來  
竹樹連雲長田疇逐地開誰知五嶺曲亦自有天台  
伐木

百尺由萌蘖孤根出草萊歷窮烟瘴苦聽盡鶴聲哀  
用大應非折裁成豈是災祇憐今夜月空自照莓苔  
小金山坐月

藏海浮香刹華幢湧梵宮青螺呈寶髻滿月現慈容  
世界平如掌江流淨似空應憐驅逐者俱墮法身中

腰沽道中

荒途無遠近，曲折似兼程。  
地逐河流轉，人依鳥道行。  
雲間孤鷲沒，木末片帆輕。  
回首長安路，難聞塞鴈聲。

太平驛

策馬望郵亭，長途舊所經。  
終朝嵐氣白，十月燒痕青。  
面熱檳榔醉，神昏海霧腥。  
孤城笳鼓動，悲壯不堪聽。

曉行

殘月掛城頭，征笳慘客愁。  
北風吹短鬢，涼露溼重裘。  
野燒連營壘，邊烽暗戍樓。  
孤雲聊淡佇，瀟酒竟如浮。

化州道中

嶺巒盤廣漠，曲折不知層。夾路疑函谷，居人似武陵。  
林深藏虎豹，天遠擊鸛鷹。何事風塵道，驅馳一老僧。

化州

孤征過萬里，道遠慨逾深。山色蜉蝣氣，人言鵲舌音。  
遽廬今日事，冰雪一生心。縱有參天木，難同祇樹林。

石城

行穿窮谷口，樹杪見天涯。野曠留殘照，城荒帶落霞。  
飢驅忘力倦，欲速較途賒。薄暮投山館，安眠似到家。

橫山堡

群山低赴壑，一水倒廻村。平野開炎徼，邊陲列戍屯。

民生空歲月，時序失寒溫。莫謂天涯遠，扶桑近日暎。  
至鮫宮

修途煩足力，廣衍入平川。地勢南溟盡，珠光北斗連。  
遠山低並樹，大海立齊天。望若垂雲翼，帆開擁寶船。  
癸卯春日大廉卽事

炎方風物異，歲事總難期。臘盡蟲無蟄，春來鳥不知。  
荳花開舊莢，榕葉落新枝。因憶燕山雪，陽和似有私。  
春日偶成

瓊海積春陰，炎蒸宿霧深。賽蘭香作瘴，勒竹苦成林。  
莫問勞生計，單看近死心。自嫌鬚髮累，日日愛抽簪。

放船

秋水芙蓉滿扁舟一葉輕  
安流猶故宅漂泊是歸程  
踈雨炎蒸退清風穀浪生  
徃來隨所適不信鷓鴣鳴  
中流望飛來寺

兩岸山垂影千峰倒入空  
雲間飛鷲嶺水底現龍宮  
細落天花雨長鳴地籟風  
急流將繫舫小可不相容  
凌江喜雪

有引

嶺南自古無雪癸卯臘月偶過凌江一見喜而志之

凍雨灑柴扉寒聲漸覺微  
乍疑梅影瘦不信雪花飛

重壓芭蕉葉輕欺薜荔衣八年勞夢想今喜見光輝  
示寂空鑑禪人

腰包從萬里七載遲炎方居卜恒河畔心牽一水長  
有身堪荷負無物可思量斷臂崖前樹重聞桂子香  
自曹溪檄還戍所

委形隨大化去住豈容心縱使驅炎海還同坐寶林  
偷生根蒂淺絕跡道源深極目寒空色浮雲自古今  
登瓊州明昌塔

大地浮香海孤標湧梵幢水天靈鷲現火窟毒龍降  
日月懸空鏡乾坤照夜缸望雲彈五指花雨墮虛窻



丙午夏日自曹溪乞食度嶺至虔州因熱致病  
寓陳文績將軍池亭時觀魚戲新水清猿嘯月  
鶴鹿依人宛若深山相與夜坐感懷賦詩五首  
冷落將軍署棲遲放客過懶輸塵事少閒睜白雲多  
揮塵慵調鹿臨池學愛鵝不知幽谷裏似此更如何  
白日炎如火高眠夜氣寒夢醒回月窟心想入冰盤  
鼓角轅門曉星河曙色闌覺來方散髮愁見籜皮冠  
池水江湖思遊魚樂未忘永懷臨大壑幽思寄豪梁  
新月沉鉤細垂楊引線長夜來風雨發鱗甲幾飛揚  
易謝諸塵累難消大患身行藏容混俗老病豈饒人

牛馬齒將缺猿猴心未純六根如割據不識與誰親  
老被閒心使生爲業力驅虛將三寸氣連絡百年軀  
藥石元非命心齋豈是愚祇愁人世苦願作佛家奴

### 山行

仄徑山腰細清流水帶長迎風松子落浥露稻花香  
村舍青蓮蕊人家白板房桃源如未到不必問漁郎  
晚下高峰遇雨宿蓮花寺

薄暮下高峰山深暑尚濃氣蒸三伏日涼灑一林松  
風急催寒雨雲腥起臥龍促歸華藏宿夢醒上方鐘  
蓮花寺

一片通香海，千峰擁化城。  
青蓮開細葉，慧月朗高明。  
世遠諸緣息，心閒五濁輕。  
微塵如可破，卽此證無生。

凌江雨過放舟還山二首

驟雨驅炎熱，新秋爽氣生。  
岸沙隨水沒，江月傍人行。  
聚沫勞生事，浮雲過客情。  
臨流觀泡影，轉見此身輕。  
一葉乘風去，扁舟趁水還。  
山盤旋若蟻，江宛曲如環。  
身與空雲合，心將水月閒。  
萬峰歸臥穩，寂寂掩松關。

烏迺果深寺

山市依雲集，花宮傍水開。  
調生閒不住，策杖偶行來。  
飯待檀那供，蓮須社主栽。  
可中清淨地，堪結講經臺。

乞食晚歸

落日晴偏好歸途寒更遲閒心雲不厭倦意鳥應知  
世路終無盡勞生信有期回看萬峰裏誰嚼紫莖芝

佛成道日

今夜明星上當初夢醒時雪山仍在眼覺樹正垂枝  
遙想航飢瘦因思獻乳糜六年寒徹骨心苦有誰知

夜發凌江

虛舟隨所適一水絕間關月色看逾好江聲聽轉閒  
浮雲身外事白髮鏡中顏莫謂漂零久前途卽故山

舟過湏陽峽

不住元爲客，虛舟信轉蓬。夾江千尺岸，帶雨半帆風。  
掠石如飛燕，乘流似履空。迷津終古意，都在去來中。

宿英州

自笑何爲者，棲棲苦問津。試摩三寸氣，可繫百年身。  
大地皆遷客，勞生總聚塵。請看江上月，曾照幾多人。

春日苦雨二首

炎徼多寒熱，清和賴此辰。可憐連夜雨，斷送十分春。  
易破關山夢，難禁羈旅人。桃花三月水，自古會迷津。  
滴滴心無緒，綠綠意轉工。一舟迷遠浦，雙眼暗長空。  
已失千村樹，還吹萬竅風。愁添新積水，滾滾急流中。

擬投老南嶽初至湖東與藏六支公夜話

投老依幽勝真期有道林百年今夜話歷劫此時心  
雪覆衡山白雲埋湘水深歸休今已矣不復費招尋

病中示諸子

厭世心成癖那堪病作魔已知餘日少更見此身多  
藥石充香積呻吟當羯磨文殊如有問一默竟如何

湘江卽事

春雨過瀟湘輕帆挂曉霜急流迴石鼓新水度衡陽  
嶽色看來近湖天望去長誰知塵海裏隨處是津梁

宿橋口

落照浸湖天，沙明月在船。  
鳥棲臨水樹，人語隔林烟。  
浮世止一宿，餘生能幾年。  
如何衰暮日，猶滯楚江邊。

過龍鬚湖宿兔子口

湖淺不難渡，風帆未易施。  
羊腸沙曲折，鳥羽岸參差。  
地折雙輪轉，天空一鏡垂。  
還看樓泊處，新月照蛾眉。

過天心湖

群山連地肺，衆水注天心。  
浩蕩乾坤大，浮沉日月深。  
帆飛隨獨鳥，野望入平林。  
儻遂扁舟去，烟波何處尋。

龍陽縣

粉堞隱朝霞，孤城傍水涯。  
沿堤多柳色，遶郭是桃花。

天遠飛黃鵠江清走白沙武陵知不遠渡口見漁家

德山禮祖四首

師據空王令余來愧晚年遙瞻千載上常見一燈懸  
鳥語言前句山光格外禪手中生鐵棒刮盡野狐涎  
脫盡廉纖見來叅古作家棒敲獅子骨舌吐鉢羅花  
光相含秋月靈龕隱暮霞室中方丈地曾辨幾龍蛇  
堂前閒托鉢獅子漫調兒覲面難回處低頭不語時  
未明未後句翻使至今疑爲問三年事因何得早知  
頂具金剛眼胸藏栗棘蓬片言轟霹靂四海走英雄  
祖意機前薦凡情當下空宗門生殺手凜凜見真風



山居十首

天地存吾道山林老更親閒時開碧眼一望盡黃塵  
喜得無生意消磨有漏身幾多隨幻影都是去來人  
髮不如心白形還似木枯衆緣閒處盡一念看來孤  
天已客疎拙禪應離有無餘生當落日步步是歸途  
生理元無住流光不可攀誰將新日月換却舊容顏  
獨坐唯聽鳥開門但見山幻緣消歇盡何必更求閑  
混世多生厭歸山念自休幾曾千載計特爲一人留  
浩浩成空劫涓涓積巨流但觀清淨理身世總如浮  
身已難憑藉支離各有因暫時連四大終是聚微塵

萬籟含虛寂。諸緣露本真。從來聲色裏。迷誤許多人。  
斗大一菴居。其中任卷舒。雲霞生戶牖。星月挂庭除。  
念息心愈寂。塵消境自如。南熏時入座。颯颯六窓虛。  
飽食無餘事。高眠晝不分。晦明殊未覺。鐘鼓幾曾聞。  
四面幃青嶂。和身臥白雲。誰言茶力健。能遣睡魔軍。  
無意人間世。遊神極樂天。唯餘可漏子。耻放拍盲禪。  
獨羨搏風翼。堪多出水蓮。回觀塵土客。誰不爲纏眠。  
此性元無着。何爲不自由。祇因生管帶。故被世遷流。  
不識空花影。堪憐大海漚。但開清淨眼。明見一毛頭。  
揮塵元吾事。閒心奈懶何。聊將精進力。調伏睡眠魔。

寂寂吹天籟，悠悠逝水波。從來無一字，應不怪維摩。

別南嶽

面帶烟霞去，中懷愧色行。止緣酬舊約，豈是逐浮名。  
猿鶴休怨別，松風不住聲。唯留廣長舌，日夜說無生。

舟行

湘水通巴漢，孤帆入楚天。片雲低遠樹，晴日照斜川。  
處世常如寄，浮生莫問年。縱遵歸去路，亦似渡頭船。

曉發湘潭

曉發清潭曲，揚舲信水流。帆飛隨去鳥，岸轉逐行舟。  
樹遠疑天盡，江空見地浮。洞庭看咫尺，漸近岳陽樓。

借風亭

天運移炎祚爭馳逐鹿秋誰知雲臥客借筇爲前籌  
帝業三分定雄心一火酬東風千古恨江漢水悠悠

過嘉魚

舟停蒲水宿侵曉過嘉魚山露城頭小江含樹影疎  
天垂疑近日水遠若憑虛一葦乘風去飄飄任所如

舟發武昌

覽勝歷瀟湘乘流過武昌江山雄漢口雲雨誤襄王  
遠跡飛黃鶴輕帆挂夕陽生涯隨逝水不必問行藏

過黃州

七澤控荆襄連天一水長江流迴赤壁山色擁黃岡  
作賦推漁父行歌憶楚狂向來思濯足今已在滄浪

喜歸匡山六首

山是前生住林從此日開誤嬰塵累去喜仗夙緣來  
骨立羣峰瘦心閒百念灰烟霞今已足何必問天台  
遯世元無悶居山不厭深密雲晴帶雨幽壑晝嘗陰  
乳鹿眠豐草歸鴉集暮林峰頭墮明月照破一生心  
垂老脫牽纏剗心易入禪偷生至今日怡逸感餘年  
夙負疇應盡良緣信未愆潛神一坏土當處湧青蓮  
盟主舊烟霞歸來便到家雲生如足跡山擁似蓮花

熟睡忘昏曉。癡禪閱歲華。可中投足地。不用一袈裟。  
白髮照衰顏。潛形賴有山。餘生唯待化。一息總歸閒。  
禪爛難開口。雲深易掩關。圓通入流水。日夜響潺潺。  
老與懶相宜。形銷氣不支。見聞渾似夢。起坐忽如癡。  
日月從朝暮。榮枯任歲時。所存唯一念。寂爾入無思。

夜坐納涼三首

夜色喜新晴。迎秋爽氣生。雨餘林葉重。風度嶺雲輕。  
靜慮觀無我。藏修厭有名。坐看空界月。歷歷對孤明。  
萬籟寂無聲。心源似水清。爐烟通夜細。山月入窻明。  
棲草蟲偏穩。眠雲鶴不驚。坐深諸想滅。忽聽曉鐘鳴。

炎熱不須辭，清凉信有時。  
雲飛山色墮，雷動雨聲隨。  
短葛休嫌重，商飈莫怨遲。  
但依松下坐，自待好風吹。

壁觀

兀坐諦觀心，來源未易尋。  
動時分朕兆，起處絕幽深。  
寂寂敲空響，綿綿出轂音。  
應知離念相，總不屬浮沉。

病二首

苦集是生因，難消大患身。  
支持唯賴骨，動轉不由人。  
一息微如縷，殘軀眇若塵。  
從來皆假借，究竟與誰親。  
久厭形爲累，那堪老病侵。  
自慚禪定淺，轉覺病源深。  
了法離諸相，觀空見此心。  
欲超生死路，不向外邊尋。

衆粥罷經行因示

粥罷慢經行沿流不問程  
脚如絲線斷身似片雲輕  
踏去山光透歸來月色明  
無勞重入室聽取夜鐘鳴

秋深

秋深寒氣重擁衲正相宜  
人老骨偏勁松枯枝更奇  
黃花生意淡白髮世情離  
獨坐忘緣後寥寥祇自知



憨山老人夢遊集卷三十六

侍者福善目錄

門人通炯編輯

嶺南弟子劉起相重較

夢遊詩集下

丙申二月抵廣州寓海珠寺

天涯歷盡尚遐征，百粵風烟不計程。  
涉險始知塵海濶，道窮轉見死生輕。  
暫依水月光明住，偶向琉璃寶地行。  
到岸舟航今已棄，上方鐘鼓爲誰鳴。

丁右武王惟吾同遊星巖諸勝未還賦懷

覽勝探奇讓謾丘，況逢簫史是同遊。  
千山緊附雙龍翼，萬壑爭趨一葉舟。  
洞裏丹砂誰可覓，雲中芝朮幾

時收莫看松下彈棋者半局令人易白頭

將之雷陽暫憇小金山

人間飄落事多非聊向江心擬息機  
有寺不容僧暫住無家應與鶴爭歸  
慈雲暗覆空生室香霧閒侵過客衣  
千古迷津懸寶筏急流肯止便皈依

記公自廬山遠問曹溪

遙向曹溪問鏡臺入門一見笑顏開  
身將廬嶽閒雲至心帶燕山白雪來  
生死歷窮天外路寒暄寫盡嶺頭梅  
故人但得如君思此念令余早已灰

甲辰曹溪奉臺檄還戍

烟霞元自邈風塵渴愛林泉敢認真老去心如無火  
木生殘形似再陽春乾坤不許逃禪輩禮法難忘出  
世人獨有空山猿鶴侶頻隨清夢伴閒身

舊同妙峰師遊河東萬固寺今聞重新賦此寄  
懷

四十年曾乞食過祇陀精舍傍恒河中條山湧青蓮  
髻華岳雲騰碧海波城郭千家還舍衛法身三展變  
娑婆何時重荷降龍錫麻谷牀前再羯磨

登烏逕水樓

穿雲過峽度平田行盡溪源見市鄽一線河流通大

海四圍山色擁青蓮樓當水月清涼土人入空居自  
在天可似桃源避秦地往來但不是漁船

端州壽馮元成使君

廊廟江湖向各天相逢豈是此生緣居官善用慈悲  
行應世安心自在禪止有祿金堪布地更無塵跡可  
隨眠曇花一現三千歲今喜重開北斗邊

舟中苦雨謝鍾二子見過

積雨陰雲晝不開蓬窗深喜故人來松花獨許攢眉  
釀蓮社寧辭作賦才世事只看如指馬此心不說比  
寒灰坐聽日暮城頭笛陣陣輕風送落梅

江上感懷

風雨蕭蕭江上舟，飄零纔見養空遊。  
夢回松頂棲雲鶴，閒看沙頭戲水鷗。  
書札不須勞北鴈，世情早已付東流。  
百年已過三之二，縱有餘生總是浮。

南征道中遇雨

北風吹雨暗山城，歲暮天涯尚遠征。  
避世想從麋鹿隊，畏途心折鷓鴣聲。  
十年瘴海孤蓬轉，一夕霜華兩鬢生。  
策馬衝泥投野宿，不堪回首暮烟橫。

寄燕都慈壽寺別山長老

當年一鉢久過從，長夜披衣聽曉鐘。  
飯食每懷香積

界經行常憶妙高峰、潛消瘴熱心含雪、暗記流年手種松、爲掃蓮花師子座、待余重舉絕言宗、

結夏法性若惺惺、公蕉園

蕉園何似坐祇園、爲借清風暫解煩、綠葉幾供懷素筆、重陰猶覆譯經軒、有房公譯經筆授軒護生不許朝持鉢、習定還應晝閉門、聞道本來無一物、故今終日對忘言、

鄒子胤過訪因示

爲叅向上訪曹溪、底事分明本不迷、曉院風生吹翠竹、春山雨過長青藜、閒來始覺諸緣靜、悟後方知萬物齊、最是喚人親切處、五更夢破一聲雞、

德山禮祖後過定王陵

當年一棒聖凡分的真機泯見聞香火千秋占王  
氣河山終古覆慈雲空林麋鹿仍隨塵淨土蓮華已  
屬君杖倚春風還佇立夕陽紫翠正氤氲

衡陽湖東結菴初成劉存赤鍾衡穎遠來相慰  
遂同度歲

十載神交費所思相逢喜見歲窮時扁舟雪夜來千  
里淨土蓮花種一枝已老形骸俱長物從頭日月是  
新知匡山莫謂當年社此地重開定可期

將東遊赴花藥寺齋二首

舍衛城西古道場，偶過三匝禮空王。觀心已入唯心土，說法還登善法堂。香飯能令多衆飽，醍醐獨許利根嘗。當人未卽輕拈出，儻可重來再舉揚。

祇園開向大江西，地湧蓮花最可棲。佛國遠超諸相外，法身高與四天齊。暫來卽請登華座，久住應頻信杖藜。可惜過從歸去日，不堪回首重悽悽。

過花藥寺梅雪堂遜菴宗師故居

梅雪堂開骨更清，齋餘閒步一經行。香浮石室花初放，影入冰壺月倍明。斷臂巖前留舊跡，懷人笛裏憶新聲。只今若問西來意，隻履誰能識去程。



過九峰禮無念祖師

梵王宮殿隱烟霞門外紅塵世路賒山自九峰開淨  
土僧從千葉坐蓮華光浮石室留宸翰影落諸天  
護絳紗若問西來端的意分明全付一袈裟

宿九峰方丈貽聞圓長老

遙向名山禮法壇此心須乞祖師安九峰夜月侵人  
白萬壑松風入骨寒已滅慧燈重發焰獨留衣鉢許  
誰傳應知天帝歸依日獅子音聲話未殘

率諸弟子赴漢陽王章甫齋

郊園遙訪漢江湄一似毗耶集衆時香飯飽食天上

供玄言喜見郢中辭平田舊是裁衣式高柳新垂酒  
露枝風雨夜深心境寂清涼疑坐藕花池

信宿天光上座接待寺

荆棘叢中古道場廿年辛苦爲誰忙堂開四海來龍  
象梵唄三時禮法玉域內圓成華藏界眉閒常放白  
毫光瞻依已入唯心土向上何須再舉揚

過曲阿喜逢王東里明府

出水青蓮住世心軒車亦似在山林空花鏡像塵何  
寂孤月寒江意更深鷺嶺想從親受記毗耶應是舊  
知音相逢一句無生話觀面分明不用尋

登徑山凌霄峰

獨上高峰倚杖藜，侵人空翠轉淒迷。  
西來二目如鵬翼，東去千山似馬蹄。  
絕壑久稱獅子窟，空林終許象王棲。  
只今欲說無生法，塵尾纔揮萬象低。

寄五嶽蔡使君

曾向曹溪結勝緣，別來冷落祖師禪。  
時談不二思摩詰，每話無生憶大年。  
自信宰官爲示現，誰知案牘是真詮。  
雪峰枯木堂前月，此夕因君缺又圓。

喜歸匡山

歷遍江湖久倦遊，青山直到老方投。  
形骸已謝空花

影世事都從逝水流寂寂閒身雲作伴蕭蕭白髮雪  
蒙頭餘年不必論多少一念無生曠劫休

林觀海明府陳赤石大叅入山見訪

匡山白社憶當時此日高軒最可追入處卽能忘世  
慮到來全不用攢眉身披萬壑雲容溼坐待千峰月  
色遲一夕清言成勝跡乾坤自古重心知

鄉人至

少小離鄉不記家回思往事總堪嗟故人猶想兒時  
面枯木難開舊日花河畔柳枝垂曉露門前山色帶  
朝霞嗟餘此景年年在不必從前問歲華

送脩六逸公歸家山

廿載殷勤伴瘴鄉。又隨瓶錫走諸方。叅玄直上金輪頂。入室還依大法堂。歸去家山雖有意。老來泉石豈能忘。餘年儻未填溝壑。遲爾同棲寂滅場。

心光法姪持雪浪恩兄手澤讀之有感

君來忽憶故人情。究竟難忘出世盟。乍見遺言猶對面。細思談笑似多生。知從兜率居高座。直入菩提豈計程。儻再相逢如昔日。肯教同伴不同行。

中秋喜陳祠部無異入山見訪

遙問空山鹿豕群。巾車入谷到斜曛。披襟細語論衷

曲煮茗焚香坐夜分喜對月明心似鏡深觀世事倏  
如雲當機若問西來意一物全無把似君

示衆

平生蹤跡任前緣慚愧形骸未脫然一片閒心隨處  
見無端白髮暗中遷自知來日皆除日誰信添年是  
減年回首家山歸去後萬峰高枕石頭眠

壽覺休繆居士

居士由來應現身金剛心地淨無塵調生久悟無生  
忍住世還同出世入摩詰法門非是默龐公妻子不  
爲親精神已入蓮華藏劫念何須問大椿

山居十首

平生蹤跡任東西，投老那能擇木棲。  
縱使脊梁剛似鐵，奈何脛骨軟如泥。  
閒從絕壑看雲起，坐倚千峰聽鳥啼。  
不必更拈言外句，現前聲色是全提。

依巖結構草爲菴，乍可容身止一龕。  
但得心源歸湛寂，任從世事付癡憨。  
三竿日上還高臥，丈室雲封不放參。  
佛祖直教蹤跡斷，何須前後列三三。

回看五濁氣氤氲，群鬧啾啾器裏蚊。  
瞥念未興迷悟絕，一微纔立聖凡分。  
青山自許容藏拙，火宅誰能爲抹焚。  
翹首長空雙碧眼，不堪大地總浮雲。

堪嗟往事夢中遊。瞥眼空花不可求。心跡信如雲散  
月形骸任似水浮漚。生存一息餘三寸。老入千峰勝  
十籌。從此人間蹤跡斷。更無憂喜上眉頭。

藏脩今已遂初心。自昔居山不厭深。空外任從千嶂  
列。目中豈受一塵侵。松風時說無生法。流水長鳴太  
古琴。入室何勞重豎拂。當機薦取在知音。

幽巖蘭蕙有餘芳。習習松風送暗香。暫借閑熏開性  
地。勝傾甘露灌枯腸。心心直入蓮華藏。念念常明般  
若光。知足便登兜率界。何勞此外覓西方。

春深寒谷笋生芽。又見松梢漸發花。一鉢待來充午



供衆僧車等試新茶空無神力諸天飯富有莊嚴五  
色霞爲問長安歌舞客幾曾飛夢到山家

三冬擁衲坐枯禪喜見春光最可憐瓦鼎野蔬將獻  
供地爐松火漸無烟青山覆雪重開面白髮防寒已  
及肩幸作太平雲臥客焚香朝暮祝堯年

舊遊恍忽是前生每憶行藏暗着驚此日青山當日  
夢今時白社舊時盟酬機但用無星秤娛老唯留折  
脚鐺若問西來端的意曹溪一派水盈盈

何事當年愛離家難忘舊着破袈裟祇因未了多生  
欠不是從前一念差半世業緣同夢幻百年妄想等

空花歸來剩有青山在豈忍將金去博沙

臥病

蒲團香案日生塵老病難容世外身入夢泉聲清徹  
耳到牀月色冷侵人閒心不與諸緣合白業唯存一  
念真究竟要知歸宿處蓮華已結未來親

酬陸使君景鄴

高車幾度過空山歷盡千峰直破關有舌不能酬密  
諦忘機正可對衰顏飛來白雪寒相照望入青雲思  
更閒遙憶轅門端坐處匡廬時在兩眉間

寄山靜光禪人

一自匡廬問法歸，別經歲月信音稀。  
顧予已入無生忍，知爾常參向上機。  
雨過雲開山骨瘦，春深日暖蕨芽肥。  
何時再振牀前錫，拈示西來屈叟衣。

憶山居六首

有引

余園中宛居深山因而有述

梢梢千年火，支撐獨木橋。  
往來人境絕，菴主澹無聊。  
白雪在簷前，飛來日如故。  
不是爾無心，如何常共住。  
明月挂寒空，光徹寒潭底。  
上下本自同，看來無彼此。  
流水不是聲，明月元非色。  
聲色不相關，此境誰會得。  
風從何處來，衆響動巖穴。  
靜聽本無聲，如何有起滅。

身在千巖裏，門前路不通。  
寂寥誰是伴，唯有數株松。

舟泊珠江

月色澹如水，潮平寒似空。  
孤舟橫野渡，人在有無中。

軍中道場吟四首

朝聞鞀鼓聲，暮聽金磬響。  
動靜雖不同，唯在知音賞。  
旌旗蔽浮雲，幢幡影朝日。  
試看生殺機，兵不似禪密。  
法鼓震龍宮，喊聲動天地。  
何似衆敷風，噫出大塊氣。  
曾坐東海上，驚濤怒破山。  
今聞震天雷，入耳心逾閒。

寄王金吾

偶會忽言別，再晤應更難。  
思君心似雪，飛夢薊門寒。

喜友人至

人生會合期杳如風雨夕與子未見時宛似雲中日  
偶成四首

風吹楊柳花東西南北走豈是愛隨他自身元不有  
野雉在樊中梁食亦不少何似處山林飲啄隨時了  
豹隱南山霧常恐羅網侵只以皮毛故是爲身累心  
膏火照夜行人益已受損豈不自愛惜生質固所稟  
憶家山竹池

萬竹飛晴雨雙池引石泉別來三十載日日憶栽蓮  
瓊山

奇甸香爲國，珠崖玉作山。  
人從塵海渡，儼若出天關。  
五指山

一葉浮天外，千山落鏡中。  
誰人揮五指，劃破太虛空。  
金粟泉

粟泛黃金屑，泉流白玉漿。  
我來持一鉢，足可獻空王。  
明昌塔

瓊海開龍藏，香幢出梵天。  
卽看火宅內，從地湧青蓮。  
劉將軍邀觀玉龍泉二首

清泉寒似玉，嘉樹密如雲。  
人有羲皇樂，心同鹿豕群。  
混沌何年鑿，淵泉此地開。  
人依空界立，山入鏡中來。

題墨香深處四首

碧草橫書帶，幽蘭結佩香。虛亭人獨坐，心已到羲皇。  
竹色侵簷綠，荷花照水紅。夜深涼露下，人在暗香中。  
芙蓉開似錦，黃菊疊如錢。醉眼熏心處，端然自在禪。  
雪逼梅舒萼，春催草發芽。目前生意事，誰識在山家。

寄膠東李生

萬里路不遠，寸心空更閒。不知思我者，如隔幾重關。

懷丁右武大叅

落葉千山雨，寒空一片雲。舉頭聊縱目，何處不思君。

咏松二首

樹老心逾赤，楓凋葉更紅。可憐霜雪裏，獨有一枝松。  
霜幹龍鱗老，風枝馬尾長。濤聲清響發，瑟瑟滿虛堂。

詠梅二首

叢林秋已晚，萬木盡凋傷。獨有寒梅樹，飛來雪裏香。  
雪色春先到，寒香夜更清。一聲幽鳥語，忽使夢魂驚。

詠竹五首

寒飛千尺玉，清灑一林霜。縱是塵心重，相看亦頓忘。  
矯矯凌雲姿，風生龍夜吼。霜雪不知年，真吾歲寒友。  
霜幹寒如玉，風枝響似琴。瀟湘一夜雨，滴碎客中心。  
葉落根偏固，心虛節更高。一林寒吹發，清夜伴松濤。



淇澳春雲碧，瀟湘夜雨寒。虛窗人靜聽，颯颯響琅玕。

喜雨三首

涼雨洒炎天，飄風振林木。輕雷響簷端，隱隱似空谷。  
元陽如烈火，群有若陶鑄。忽然風雨來，炎蒸在何處。  
山空泉更寒，暑氣無來往。颯颯風雨生，毛骨更清爽。  
山中吟六首

塵隔三千界，心超十八禪。鐘聲清夜發，聽徹不成眠。  
日月不知去，此心應合空。山樓時獨坐，彷彿在鴻濛。  
枝頭春已動，草木氣相鮮。靜裏觀時化，心忘有漏年。  
時折寶林松，旋汲曹溪水。來煮雪中茶，此味無可比。

萬山寒色破地氣暖生春花落曹溪水何人肯問津  
無事晝打眠松風吹不徹何處木魚聲夢中響更別  
偶占

一滴曹溪水千株逼漢松人依空界立宛在畫圖中  
示知事僧二首

斷臂巖前雪而今血尚濃黃梅腰下石能得幾人春  
積雪苦凝寒叢林盡凋沍一陽纔動時枝頭春已露  
董國博過訪曹溪因贈

曹溪一滴水流浪滿江湖隨君化霖雨到處洒焦枯  
夏日王癡過訪

炎熱毒如火、茶香冷似冰、誰知天壤內、除嬾盡輪僧。  
送悟心融首座二首

一片江南雪、來清瘴海炎、君今度嶺去、寒色帶眉尖。  
七尺藤過頂、三食飯滿瓢、何時萬峰裏、倦飽臥雲霄。  
對月

雪嶺孤松老、曹溪滴水寒、誰知今夜月、猶是昔時看。  
舟過小金山四首

一度一回新、重來不厭頻、祇因貪佛日、時禮法王身。  
青山常不改、流水去還來、獨有松間月、清光照綠苔。  
漁火夜深白、沙鷄清晝喧、江空人境絕、長日掩柴門。

階下魚龍穩沙頭鷗鷺閒盈盈剛一水隔斷萬重山  
喜黃生公亮歸自薊門五首

人生無百歲逢君時過半忽別又三年離合安可算  
昨日乘虛舟夜來忽風雨今朝喜逢君杳然如夢許  
塞上草頭白燕山楓葉丹唯餘寒雪色君尚在眉端  
驛路千行柳江湖萬里波往來空歲月誰不爲蹉跎  
羅浮半輪月曹溪一滴水與爾共食之意味無彼此

喜曇欣慶公至

君從白下來慰我炎方熱火宅喜相看如對燕山雪  
招慶公嘗荔枝

長夏火雲紅五月，荔枝熟與君坐珠江。日日敲寒玉，對慶公懷舊。

菴居與君隣，水竹清同好。一別三十年，相看今已老。寄蒲坂襄垣震崧二宗侯三首。

一派黃河水，遙從天上來。滔滔東入海，借問幾時回。華嶽雙峰出，高空碧玉寒。遙聞天樂響，應是禮仙壇。中條山色青，朝霞散晴綺。知有忘世人，獨坐觀無始。夢遊天台二首。

忽到天台山，相遇雲中老。想是避秦人，顏色如此好。飛上華頂峰，忽聽天鷄叫。遙望蓬萊山，掀髯發長嘯。

懷舊

夢坐龍華樹聽殘長樂鐘醒來空谷裏萬壑吼松風  
懶殘老衲住山

菴小山藏寺心虛芥納空嬾眠松下石坐斷最高峰  
將之雷陽別曇公于江上

送別芙蓉江江水秋逾碧歸舟遡寒流來往心如織  
詠月

湛海光如有寒空色若無誰知俯仰內千古照迷塗  
詠雲

一點如纖翳瀰漫塞太虛但知已起後不見未生初

試端硯三首

君子愛佩玉，溫潤象其德。此石尤過之，所寶在翰墨。  
詞海萬里流，筆峰千丈雪。盡向此中生，時時飛玉屑。  
浩浩清江水，磊磊紫石山。誰知千古意，元在混茫間。  
化城菴二首

山色自朝昏，榕陰閒古道。多少往來人，紅塵空浩浩。  
鑿井在高原，土深水難得。施工極盡時，淵泉流不息。  
罄室

斗室懷幽壑，窮交見古人。雖餘方寸地，無處著囂塵。  
明禪人施茶

此心元不住白足本無塵時汲源頭水清涼熱惱人  
寄慶堂首座

憶爾栽茶處滿園春雨滋何時掃松葉相對一烹之  
寄宗遠西堂

曹溪春水漲衡嶽鴈歸時憶爾跣趺夜松門月上遲  
寄題龍興寺禪堂

王氣鍾山嶽經聲徹帝宮法筵龍象衆萬世祝  
堯風

寄 皇陵供奉

乾坤開帝業日月轉河山香火勤供奉晨昏仰 聖



顏

題画小景二十一首

流雲覆春山，輕寒凍欲坼。何處踏青來，歸時月華白。  
芳樹夏初長，輕舟湖水碧。携琴訪故人，雲深何處覓。  
斷橋人影橫，扁舟霜月白。回首望雲山，悠然塵市隔。  
烟樹春雲綠，江天落日紅。不知何處醉，歸向月明中。  
風雨孤舟夜，微茫草樹春。茅簷驚犬吠，定是渡江人。  
江閣流雲細，孤村白日閑。小橋橫野水，隔斷萬重山。  
晏坐桃花塢，幽居遠市塵。祇緣春色好，不是爲逃秦。  
高樹咽新蟬，深林掩茅屋。斷橋人影橫，白雲滿山谷。

瀑布寒空外，孤亭水石間。日長無個事，結伴看春山。  
秋水碧如玉，遠山凝似脂。夜深魚不食，釣餌爲誰施。  
浙瀝寒林瘦，潺湲水石清。白雲千萬里，相對總忘情。  
萬木流雲密，千山落照寒。衡門長日掩，酒伴暮相看。  
遠樹晴烟合，江空草閣寒。行吟同澤畔，始信獨醒難。  
古木蒼松老，清泉白石奇。携琴問知己，遙望酒家旗。  
江閣坐忘機，凭欄望夕暉。沙頭人竚立，擬待月明歸。  
雲白天垂練，江清水合空。相携尋酒伴，同過石橋東。  
秋山雲氣薄，紅樹曉霜清。一帶湖天濶，空留待月明。  
山似天台路，花無秦代春。漁郎坐溪口，不見問津人。

彤雲四野迷層冰萬木折衝寒訪故人踏破連山雪  
萬山凝積雪高樹折輕冰何處寒梅發香勾一個僧  
秋山新雨霽遠水澹無垠湖上幽人宅悠然隔市塵  
南嶽逢何玄圃

相逢南嶽前坐對中秋月清光徹夜看疑是燕山雪  
玉山

閒登玉山頭城中見烟火萬井密如雲蓮花青朶朶  
望江樓

獨上望江樓四面山如織中有食霞人相對不相識  
高山寺

山城枕江流，梵刹雲中起。鐘鳴萬戶開，人在蓮花裏。

愚溪

愚溪何似我，我愚溪不愚。流泉日夜響，說法聲嗚嗚。

華嚴菴

菴近恒河水，僧依舍衛城。經聲和人語，總是說無生。

雜咏二首

白鶴飛冲霄，翛然任去住。可惜無礙身，不知生死路。  
螻蟻慕羶腥，逐氣呼伴侶。忙忙不暫停，所得能幾許。

偶成二首

法侶千峰影，生涯數畝田。信知人世裏，難結此中緣。

青山待人歸本欲求深契誰知來者心動靜多相戾

山居十三首

片雲浮太虛倏忽遍大地試看未生前清淨無纖翳  
萬境本寂然因心有起滅一念若不生動靜何處覓  
長夜無燈燭脩途總暗冥可憐酣睡者大夢幾時醒  
青山容易入白業不難脩獨有降心法英雄讓一籌  
一枕黃梁夢千秋汗血功祇知常不朽誰信轉頭空  
雪老蒼松古僧閒水石清坐來忘百慮眼見一身輕  
酷暑不可人清風來竹下颼颼涼氣生毛骨頓蕭洒  
風靜蟬聲急龍歸雨氣腥乘涼高樹下閑寫換鵝經

雲深便野寺僧老愛扶筇乞食歸來晚愁穿十里松  
爽氣入疎林萬山秋色好貪看溪頭雲忘却來時道  
獨坐長松下悠然太古心高山流水意誰復是知音  
日月如飛鳥乾坤似轉丸浮生忙裏度誰向靜中看  
長明一碗燈夜對心更寂多少醉眠人夢中狂未息

山居二十首

六言

松下數椽茅屋眼前四面青山日月升沉不住白雲  
來去常閒

雪裏梅花初放暗香深夜飛來正對寒鐙獨坐忽將  
鼻孔衝開

幾片白雲不去，一輪明月飛來，伴我山中寂寞笑他世上塵埃。

一片寒心雪夜，數聲破夢霜鐘，爐內香銷宿火，窗前月上孤峰。

滿面清霜冽冽，盈頭白髮蕭蕭，世上空花影落，目中幻腎全消。

淅淅泉聲入耳，明明祖意西來，不動舌根常說，何須再歎奇哉。

幽谷蘭香馥馥，中宵月色娟娟，一段清塵勃勃，無端打破枯禪。

一念忘緣寂寂孤明獨照惺惺看破空中閃電非同  
目下飛螢

雲散長空雨過雪消寒谷春生但覺身如水洗不知  
心似水清

衰朽應憐骨弱看來轉覺心強午夜脊梁似鐵常時  
一念如霜

空谷諸塵盡謝止留一片閒雲伴我松根揮塵堪多  
麋鹿成羣

文字眼中幻覺禪那心上浮塵內外一齊拈却大千  
世界全身



靜夜鐘聲不住，石牀夢想俱空。開眼不知何處，但聽滿耳松風。  
清淨涵空寶鏡，春來水滿彭湖。照徹廬山面目，月如額上明珠。  
蓮漏六時猶短，長香百刻安排。日夜真常流注，識神早托華胎。  
一片雲封谷口，千峰劃破虛空。中有數椽茅屋，深藏白髮山翁。  
可惜青山常在，堪嗟白髮時新。盡是塵中逆旅，誰爲物外閒人。

山色愁含宿雨、松聲冷咽清霜、乞食僧同倦鳥、娥眉  
月上新粧。

世界光如水月、身心皎若琉璃、但見冰消澗底、不知  
春上花枝。

門外青山朶朶、窻前黃葉蕭蕭、獨坐了無言說、回看  
妄想全消。

舟中卽事

空水連天一葉舟、卽看身世等浮沤、鴈聲叫破緣生  
夢、明月蘆花古渡頭。

大姑山

霞帶雲裳月偃眉江湖滿目少相知寒流徹底心如洗莫問夫君是阿誰

姑山塔

空裏浮圖水月身太虛中點一微塵行人兩眼重添屑幾個男兒認得真

鄱湖寶陀寺

玻璃宮殿水晶盤面面青山碧玉欄中有一人常說法西江吸盡夜潮寒

過桐江輓曾健齋光祿

龍華樹下舊相逢每夜談心聽曉鐘今日覓君桐水

上空含血淚洒春風

清江漁父詞二首

水清沙白月如鉤影落波心釣未收無限遊魚吞不  
得空教漁父抱深愁  
一葉輕舟逐浪翻五湖風月任加飡夢魂常在深深  
處最苦離釣水更寒

舟次橫浦

五雲一水入南安萬疊山迴六六灘行到水窮山盡  
處梅花無數嶺頭看

登南安城

城頭辦辦湧青蓮花蕊香含萬戶烟身在鏡中人不識更於此外覓諸天

度大庾嶺二首

一徑雲霞閣道深梅花松雨氣陰森翻思昔日宵行客何似今朝度嶺心  
嶺上寒梅正發花枝頭雲擁舊袈裟試將拄杖重拈出香逐天風遍海涯

曹溪謁六祖大師二首

曹溪滴水自靈淵流入滄溟浪拍天多少魚龍從變化源頭一脉尚泠然

樵斧纔拋石墜腰、黃梅夜半寂無聊、自持一鉢南歸、  
後從此兒孫氣日驕、

廣州道中二首

烟水南遊歷百城、相逢知識總無情、挨身纔欲須臾、  
住又指前途向別行、  
兩岸中流總不容、扁舟逐浪任天風、直須高挂孤帆、  
去自信恩波到處同、

抵雷陽戍所

瘴海嵐烟日夜浮、龍蛇氣吐混清流、到來盡是無生、  
國愈見君恩未易酬、

寄少林無言宗師二首

五乳峰頭草木深，春來花發滿空林。  
峰頭積雪仍千尺，誰似當年斷臂心。

清涼會罷復長安，一度相逢一度歡。  
別後天南望天北，炎風朔雪兩相看。

放舟波羅江

片帆東去海波平，蕭鼓如從天上鳴。  
遙望三山天外落，不知人在鏡中行。

寄小金山珍公

天風吹上妙高臺，午夜乘潮載月回。  
洒掃楞伽山上

石待余重爲寫經來、

小金山三首

萬里長波萬里流，誰將拳石砥中洲。不因禹鑿開三級，自是魚龍會點頭。

水晶宮殿絕塵蹤，香霧氤氛露氣濃。明月空中浮客櫂，夜深堦下臥魚龍。

山浮水面寺依空，樓閣虛無杳靄中。不是幻成人世界，多應天湧梵王宮。

寄河東妙峰師三首

首陽山色枕河流，師住中條最上頭。麻谷牀前章敬



錄至今風韻鬼神愁

黃河一線自天來流入中原洗却灰把斷要關看砥柱慈航不數濟川才

天涯行盡路途難毒霧炎風任飽食忽憶龍門千丈雪猛然提起徹心寒

答高常侍寄香

一瓣名香出上方封書遙寄到炎荒夢聽刁斗疑鐘磬夜起親焚禮法王

懷五臺龍門舊居

萬年冰雪擁茅廬一別于今廿載餘叶斗峰頭明月

夜不知誰在此安居

憶匡山

遙憶匡山五老峰，白雲深鎖萬株松。  
寒空月照彭湖水，瀑布聲飛幾度鐘。

懷匡山天池憑虛閣主人

空中樓閣閣中人，宛似花間自在身。  
午夜天池浸明月，不知此際與誰親。

五羊喜譚子文至自薊門二首

西山雪擁薊門寒，曾憶圍爐坐夜殘。  
一別杳然如隔世，相逢疑是夢中看。

炎風朔雪兩無憑。火宅何如大地冰。相對莫驚鬚髮改。此心元是五臺僧。

憶家山并諸舊遊

有引

余別家山三十餘年矣。今被放嶺外。適法兄珂公同廣姪遠慰。因成三絕書還懸之舊壁。以見人生幻跡如此。

萬竿竹遶舊菴居。樓上仍懸讀遍書。夢見四簷青不改。空留明月照庭除。長安陌上舊行蹤。吹盡微塵曉夜風。別後消磨三十載。不知幾許出虛空。

憶昔兒童共聚沙，百千嬉戲笑如花。  
風霜縱使形容變，此念渾同未離家。

本寺回祿，余亦遠遊。久抱修復之念，今聞恩兄  
已新寶塔而殿宇尚在，荆榛感念，嬰心遙寄以

詩

洞然劫火憶當年，寶塔如生火裏蓮。  
今見優曇花再現，何時重覩率陀天。

獨坐

七軸蓮華一炷香，晝長趺坐倚匡牀。  
市塵門外深千尺，唯任輪蹄日夜忙。

送劉貽哲還鄉兼東諸故人三首

瘴海三年共此心，形骸總不屬浮沉。  
君歸獨載秋江雪，寒波思更深。

身驅馳心自閒，窮廬獵隊等青山。  
故人儻問余消息，只道婆娑鬢已班。

世路崎嶇不易行，幾能真見是浮生。  
君歸儻過西湖上，試看蓮花出水情。

軍中寄懷虛谷師

禪板輕拋事鼓鼙，跣趺鞍馬不相宜。  
夜深月照轅門下，恰似松陰對坐時。

懷天台山二首

天姥雲霞傍海多半生夢想竟空過何時一曳撩天杖打醒癡僧寂滅魔

華頂峰頭月倍明石梁橋下水偏清能持一滴來炎海猶勝曇花盞內生

曹溪四時詠

祖意明明百草頭春林花發鳥聲幽朝來雨過山如洗紅白枝枝露未收

四山密密綠陰濃窻下風來水面松午睡正鼾纔欲夢長廊忽聽一聲鐘

刀耕火種是良方。秋到家家晚稻香。放不下時擔取去。何如老偃在韶陽。

夜深旋煮雪中茶。此味天然最可誇。更有一般奇特處。滿林寒月浸梅花。

軍中吟二首

鐵甲天教當敝裘。從軍元不爲封侯。身經赫日如爐冶。傲骨而今鍊已柔。

緇衣脫却換戎裝。始信隨緣是道場。縱使炎天如烈火。難消冰雪冷心腸。

陳生讀書天寧寺

跡寄祇園已出塵。夜眠應與佛相親。夢魂忽被鐘敲破。始信元爲聽法人。

海月樓

海天空處一樓居。方丈中涵無盡虛。夜起開窗放明月。波光霞氣滿襟裾。

劉生讀書石湖

心似寒泉色若冰。幽居不讓石巖僧。夜烹一滴源頭水。乞火頻分照佛燈。

寄雲棲大師

長眉鶴髮久棲雲。麈尾時揮繞鹿群。遙寄旃檀香一



瓣想師拈對法王梵

寄屠赤水居士

維摩家近白花山烟水微茫海印寒聞道文殊又東  
去不知香飯對誰食

寄馮開之太史索楞伽經序

憶昔千華一對談珍衣脫却久藍氎楞伽山上摩尼  
聚何日重開百寶函

讀達觀大師末後偈

一念從來絕覆藏通身不落是非場試看撒手輕拈  
出始信阿師熱肚腸

懷五臺舊居

叶斗峰頭雪未消，別來音信久寥寥。  
炎方屢夢經行處，曳杖閒過獨木橋。

軍中寄懷黃羽李侍御六首

十年戎馬走炎荒，常憶同遊海印光。  
大火聚中求着脚，與君別處最清涼。

聚散浮雲不可期，此心未離別君時。  
兩輪日月如飛鳥，來往無停促夢思。

大海長江一脈通，烟波浩渺總如空。  
萬山縱使能相隔，恰似空花落鏡中。

虛空大地可消亡此念如何屬斷常試問維摩方丈  
內近來諸有置何方

君先待漏紫宸朝遙把楞伽問寂寥侍者飽餐香飯  
後至今一粒未曾消  
世事虛空最是閒乾坤何地沒青山知君正眼相看  
處不在音聲色相間

寄水田南臯鄒給諫

門前一片福田衣時折松枝當麈揮山色溪聲常說  
法不知若個是當機

題香爐峰紫雲菴

香爐峰下紫雲深，松竹層崖白晝陰。  
門帶長江接溪水，清流洗盡世間心。

山中夏日

如焚夏日晝偏長，渴想菩提樹下涼。  
一陣風從空裏過，送來何處藕花香。

懷九華山

九江江上秀芙蓉，一帶雲霞六六峰。  
迴首瘴鄉明月夜，無端清夢挂寒松。

繹公自衡陽來叅

遙向曹溪獨問津，溪頭秋水淨無塵。  
持來一片衡山石，

月猶照當年獵隊人

寄茶陵劉存赤居士

見面何如未見真  
竭來消息嶺頭春  
衡山月色曹溪水  
徹底相看是故人

舟次螺江訪僧鍾公不遇

曾坐江樓待雪消  
螺江春水急於潮  
今看白鷺洲前月  
猶似當年伴寂寥

蒙恩宥還山

少小爲僧五十年  
老來特地混塵緣  
從今斷天涯路  
此去千峰白晝眠

夜坐

露洒幽蘭撲鼻香。風吹毛骨夜生涼。坐來已覺心如雪。月色還疑地上霜。

夏日過法性寺二首

菩提樹下風祛暑。般若臺前雨送涼。一盞清茶諸想滅。更於何處覓西方。

覺樹當年向此栽。初心爲待至人來。千秋衣鉢今仍在。說法誰登舊講臺。

懷雪峰枯木堂

枯木堂前冷似冰。當年曾坐半千僧。遙思一片寒灰

地何日重挑午夜燈

題画二首

飛來山色掩湖光  
烟樹新晴帶夕陽  
遙聽上方梵率  
界半天鐘鼓落微茫  
一片烟波十五橋  
雲山落水晚蕭蕭  
孤城半壓吳江水  
水上人家夜聽潮

將之雷陽江上別曇公

相逢庾嶺日初遲  
欲折梅花第幾枝  
忽逐秋風度炎海  
別君不似見君時

懷舊居

安居舊住竹林西，明月溪頭幾杖藜。  
常想夜深松露下，不知猿鶴向誰啼。

寄浮山澹居鎧公

浮山九帶事如何，回首當年已爛柯。  
爲問夜深趺坐處，白雲明月是誰多。

舟次小金山志感

常思半月經三度，倏爾睽携又五年。  
此日重來峰頂坐，德雲元不是生前。

憶山中梅二首

曹溪梅花每至盛開，如坐香積世界。  
今冬以魔作。



崇牽次芙蓉江上望山中咫尺不得坐享香供詩  
以憶之

寒梅帶雪嶺頭開，冉冉天花落講臺。  
好遣上方香積國，爲予一鉢盡擎來。  
梅花香樹積成林，香氣熏人悅可心。  
樹下現敷獅子座，風聲誰解海潮音。

得東海門人江吾與書二首

從空一紙故人書，萬里遙來問起居。  
爲報親知零落盡，滿頭霜雪更愁予。

十五年來坐瘴鄉，海叟相對未能忘。  
時看萬里中霄

月一似同遊海印茱

古佛松林

松陰幕幕淨無塵  
山色雲光自法身  
日夜風濤廣長舌  
不知聽徹是何人

開元曉鐘

明河清淺澹踈星  
古寺虛簷宿百靈  
一擊曉鐘驚大夢  
不知誰景獨稱醒

平原古塔

浮屠何代擁諸天  
傳是隋朝大業年  
蒼蘚剝封殘碣盡  
平原荒草布金田

寄愚菴法師

遙想華臺坐講時，四天彌覆法堂垂。  
座中龍象清如許，可記炎荒老赤髭。

寄草堂法師

瘴海還從坐寶林，常懷法窟舊知音。  
遙看一片燕山月，盡是隨緣度世心。

山居偶成四首

百年世事空華裏，一片身心水月間。  
獨許萬山深密處，晝長趺坐掩松關。

滾滾紅塵世路長，不知何事走他鄉。  
回頭日望家山

遠滿目空雲帶夕陽  
開藍誰肯急抽身自古青山隔市塵莫謂桃源無路  
入落花流水是知津  
日夜烟霞護翠微相將猿鶴待忘機青山莫道閒無  
主自是閒人不肯歸

送隱知禪人還蜀

一錫冷冷過瘴鄉巫山西去思茫茫峨眉峰頂新秋  
月知爾看時到上方

寄題杜將軍曇花精舍二首

鼓吹轅門獨晏然曇花樹下晝安禪誰知可汗歸王

日正是將軍破有年

鐘鼓胡笳總道塲  
旌旗影裏坐焚香  
思君力破群魔壘  
自許心空見法王

送慈公還五臺

一別臺山三十年  
眼前冰雪尚依然  
君來細說窟中事  
又結多生未了緣

寄空印法師

憶昔臺山百尺冰  
與君對坐骨崢嶸  
翻思三十餘年事  
夢裏相看似不曾

別曹溪二首

爲決曹溪萬里流歸心常撫大刀頭因思血浸齊腰  
雪千古令人痛未休  
自爲曹溪杖策來坐看山色笑顏開從今一別千峰  
去鳥語溪聲不盡哀

初至衡陽喜雪二首

七十峰頭雪正寒到來深見此心安回思火宅驅馳  
地盡入冰壺影裏看

五熱場中幻化身廿年來徃任風塵今歸一片瀟湘  
雪原是清涼徹骨人

山居二十八首

余生平抱烟霞之癖早年行脚三十住五臺冰雪  
中者八稔及居東海一十二載知命之年乃被業  
風吹墮瘴鄉將二十年嗟乎人生幾何忽忽往來  
已七十歲浮光幻影豈能長久頃蒙 聖恩賜還  
初服特來南嶽作投老計因緣未偶乃就湖東古  
道塲地仗諸檀越助營安居創始于甲寅九月旣  
望落成于臘月逼除草草苟完從此一片身心始  
得休息之地如久客還家以釋重負其逍遙洒落  
何快如之隨有口占命侍者錄之以志幽懷非言  
詩也興來卽筆略無次第云耳

祇園借得一枝安從此無論道路難日上三竿高臥  
穩相看不必勸加餐

雪壓衡門夜擁爐此身雖寄恰如無不知日月從何  
去回首人間歲已徂

灌木叢中一小菴石牀爲座草爲龕杜門口似維摩  
詰莫問前三與後三

形如枯木念如灰雪滿頭顱霜滿腮不是老來偏厭  
世眼中無處着塵埃

身心放下有餘閒垂老生涯在萬山不許白雲輕出  
谷好隨明月護柴關



寒燈獨照影微微  
踈屋風吹雪滿衣  
忽憶五臺趺坐處  
萬年冰裏一柴扉  
寒威入骨千峰雪  
怒氣衝人萬竅風  
衲被蒙頭初睡醒  
不知身在寂寥中

百千世界空華影  
一片身心水月光  
伎倆窮時消息斷  
可中無處着思量

地爐無火石牀寒  
瓦鼎香消坐夜殘  
萬籟聲沉心更寂  
却疑身在鏡中看  
四圍嘉樹影扶踈  
樹下深藏一小廬  
車馬不聞人跡斷  
閉門長日獨踟躕

寒雨瀟瀟風滿林蓮花漏永夜沉沉誰知舉世難醒  
夢盡是光明般若心

夜深獨坐事枯禪撥盡寒灰火不然忽聽樓頭鐘磬  
發一聲清韻滿霜天

雪滿乾坤萬象新白銀世界裏藏身坐來頓入光明  
藏此處從來絕點塵

平湖冷浸芰荷衣湖上青山絕是非塵跡盡消人世  
遠白雲鷗鳥總忘機

雪擁柴扉獨坐時寒林寸寸折瓊枝曉來頓失青山  
色開盡梅花總不知

春過人日雪初晴新月疎林影更清夜起推窻望寥廓滿天星斗挂簷楹

雲開四野動春光何處梅花送暗香曳杖欲尋幽谷去一枝斜倚在東牆

一片雲封萬壑松門前流水日淙淙不分晝夜供鼯睡好夢驚回隔嶺鐘

春深雨過落花飛冉冉天香上衲衣一片閒心無處着峰頭倚杖看雲歸  
信步騰騰任所從形骸一似雪中松偶來纔向溪頭立又逐閒雲過別峰

麋鹿空山孰可從  
輸他豐草與長松  
紅塵縱有難醒夢  
絕世何曾到萬峰

垂垂白髮對青山  
身在千巖萬壑間  
寂寂松門無過客  
往來唯有白雲閒

青山不動自如如  
朝暮雲霞任卷舒  
縱有紅塵深萬丈  
曾無一點到茅廬

萬峰深處獨跼蹐  
歷歷虛明一念孤  
身似寒空挂明月  
唯餘清影落江湖  
睡起呼童旋煮茶  
竹爐湯沸雪如花  
旗鎗未豎魔先退  
始信叢林有作家

倦倚虛窻坐看山千峰紫翠出松間無心縱許雲來  
往何似如如體更閒

月色松聲總見聞禪心妄想聖凡分消歸一念無生  
處此意如何把似君

平湖秋水浸寒空古木霜飛落葉紅石徑小橋人跡  
斷一菴深鎖白雲中

寄舜菴老衲

三十餘年學懶慵生涯坐斷祝融峰身輕鶴骨休言  
老千尺還看手種松

寄魏考叔

幽居宛是在家僧一室清如六月冰縱使善空諸有  
盡尚餘山水挂眉稜

留別湖東社中諸子二首

曇花舍就竹林西市遠塵囂最可棲勤掃堦前雲臥  
地歸來莫使草萋萋  
偶來松下掩柴關招隱相求出世間豈意又隨流水  
去別君心似戀雲山

岳陽阻風二首

岳陽樓外浸湖天樓下沙汀夜泊船來往風帆留不  
住獨餘山色尚依然

北風吹浪打山城一葉輕帆阻去程想爲留着洞庭  
月怪來偏向客邊明

過金沙于潤甫雲林

咫尺雲林望不遙到來寒爽氣蕭蕭閉門不放烟霞  
出多少塵心亦易消

西湖偶成

四面湖山鏡裏看樓船深浸碧波寒不知身在冰壺  
影可笑沈酣夢未殘

喜歸匡山

垂老青山荷主恩匡廬南向臥朝暾七賢五老遙

相對泉響深談不二門

輓匡山黃龍徹空師二首

昔與師住五臺冰雪中者三載別來三十餘年所  
矣予今投老匡山一禮師塔輓之以詩

憶昔清涼對坐時垂垂冰雪綴雙眉別來夢到傷心  
處一段難禁祇自知

塔影團團擁萬松法身不動聳千峰知師常說無生  
法鳥語溪聲和曉鐘

山中雪夜

雪擁千峰獨閉關寒燈深夜照衰顏心灰已絕紅塵



夢誰信人間有此閒

閱華嚴經十地品夢中偶成

一葉輕舟一釣竿  
鉤頭香餌未曾殘  
直須入海深撈  
撈莫滯蘆花淺水灘

思鄉曲二首

余十二歲離鄉今六十年矣適鄉人遠問於山中  
因賦此

門前高柳映清池  
常記兒童戲浴時  
六十餘年如夢  
事幾回猶動故園思

青山一帶遶河流  
家住河邊古渡頭  
自小離鄉今已

老此心不斷水悠悠

懷大都龍華主人

龍華樹下有緣人，一別難求似昔親。  
幾度夢魂飛夜月，縱然相見總非真。

入山

直入千峰不厭深，最幽絕處可安心。  
松門任使青苔厚，從此時人沒處尋。

曹溪堂主俛無昂公來訊二首

自別曹溪已十春，常思香水一霑唇。  
夢魂時坐松陰下，只恐今生是後身。

溪上梅花不斷香。幾回香霧溼衣裳。年來每到看花處。一似當時坐法堂。

送青林熙公遊南嶽二首

憶昔曾登七十峰。倚天傍日撫長松。幽巖絕壑探竒  
遍。君去尋余策杖蹤。  
萬峰深處碧雲寒。曾結茅廬學懶殘。牛糞尚埋煨芋  
火。君應一撥地爐看。

偶成

湛海波澄一物無。寒空深夜月輪孤。但看萬里纖雲  
斷。自覺冰心在玉壺。

集外詩五首

喜老母遣弟至

天屬憐同蒂，君恩賜一身。  
生還如有日，尚可奉慈親。

憶故鄉鄉居

家住龜山陰，宛似恒河曲。  
却憶兒童時，熱在河中浴。  
夾岸柳陰濃，當戶南山翠。  
手種碧桃花，不知在也未。  
門前一小橋，幼見水衝斷。  
欲架獨木枝，路遠猶未辦。

憶鄉友

幼小回讀書，連牀還共被。  
誰知一別來，看看六十歲。

却憶聚沙時相戲常生惱只記童子顏不信今衰老

憶家山菴居

樓居水竹總相連長夏清風白晝眠此日炎荒萬里  
外回思恰似幾生前

憨山老人夢遊集卷三十六

終